

Paul, Philemon Ts'ó K'e Yanguz-i

Paul, Philemon hadih yúlhni

¹ Si Paul 'ust'oh. Sizi Gri ba 'adus'ai. Timothy neulhutsin, sulh 'unt'oh. Philemon nyun nts'o k'e tigus. Neulhutsin, nk'ets'intsi'. Nek'eke 'ink'ez nebulh 'ut'en-un inli.

² 'Et Apphia 'en cha ook'ets'intsi'. 'Ink'ez Archippus neBá ba nebulh lhugan-un unli. 'Ink'ez nyoh Yak'usda ba 'ilhunaoodulhne, 'enne ts'iyawh hadih butsutni.

³ Yak'usda neBá 'ink'ez Sizi Gri neMoodihti, 'en ye unzoo-i 'ink'ez nohdzi doghel-i nohbulh óot'e'.

Sizi Gri mba 'alha' 'unt'oh 'ink'ez ook'ensi'

⁴ SYak'usda musi dusni. Tenadusdli totsuk nghu nuní nuszut.

⁵ Whulh 'údusts'o Sizi Gri mba 'alha' 'unt'oh 'ink'ez ook'ensi'.

'Ink'ez Yak'usda ooch'e'ne, 'enne cha whuz un'a za buk'entsi'.

⁶ 'Et be mba 'alha' 'uhoont'oh-i, 'i be óodutnih sih. 'Et whe Gri Sizi 'en gha 'ut'en unzoo-i ooghá izana'-i, 'et la t'eeonoodzeh.

⁷ Sulhutsin nyun nga Yak'usda ooch'e'ne budzi doná'uja. 'Et be nék'ets'insi'-i 'int'i-i, 'i gha tube ts'uhóont'i' 'ink'ez sóo k'unuznut'ah cha' 'i gha ts'ut'i.

Paul Onesimus ba tedidli

⁸ 'Et huwa Gri 'en be lhoostoh whe nts'o hukwa' dusni-un 'oh tune' 'ont'en. 'Et whuz un'a ts'ih'un 'uhoont'oh.

⁹ 'Et hoonts'i be nek'éts'insi'-i, 'i gha nts'u tédusdli. Sunilh'en nts'en'a dast'oh yoo 'un uzulh-un usdli. 'Ink'ez 'andit Sizi Gri 'en ba 'adus'ai.

¹⁰ Sye' Onesimus 'en ba nts'un tedusdli. 'En 'unt'oh lhuztih tl'ool be suzhel whe ooba 'alha' 'uhoont'oh susi.

¹¹ Whuts'o da' nyun nts'un 'aw hoonli huba unzoo-un hooloh inle'. 'Et 'andit nyun 'ink'ez si sba cha unzoo sulí'.

¹² 'Andit 'en nts'u whenas'a' 'ink'ez naóolhchoot. 'Et 'ants'i sich'oh sdzi ilhchoot le' tanelh.

13 Njan szih tidalh hukwa' nuszun inle', njan khuni unzoo-i gha suzhel. 'Et da' nyun ngha snat ne'óot'en oole' da'.

14 'Et hoonts'i nyun, "A'a," lhduzinih de za, 'aw hoonli 'uwhtislelh-un hukwa lhe'nuszun. 'Et whuz un'a nyunch'oh hoonínt'i' de za.

15 'Et huwa tilah 'atsulyaz nghu whinya inle!. 'Et de 'ilhiz wheni naóolhchoot de, 'ilhiz la nzih ooda',

16 'aw 'on 'un nye 'ulhna lhtisdle. 'Et 'andit 'ulhna unli-un whanus 'unt'oh. Neulhutsin ookw'ets'intsi'-un unli. Si tube sba dízti' 'et hoonts'i dalcho-i be suba nyun 'on nus mba dízti!. 'Et náwhult'oh, ndi yun k'ut huba cha 'ink'ez neMoodihti ba cha.

Si sk'un'a nailhchoot

17 Si nyulh 'úst'en suninzun de, si nasilhchoot hukw'un'a nailhchoot.

18 'Et ndun hoonliyaz whe nts'u nínta' 'ant'en de, k'us nts'u whulh'ai de, si sba 'uk'e hoonges.

19 Si, Paul, sich'oh sla be nts'o k'e' usges. Si la ook'elha hooselh. 'Et hoonts'i hoonliyaz mba whunatizni, nyunch'oh be khina-i, 'i be hoonts'i nts'ún whuzus'ai le' hoont'oh.

20 A, sulhutsin neMoodihti be nyun ngha 'on nus hoonzoo-un nts'un hukwa' nuszun. Nts'en'a la syo ts'e whedúsni, 'et neMoodihti be sdzi dona' 'inleh.

21 Nts'ó k'esges-i, ook'un'a 'utanelh-un sba 'alha 'uhoont'oh. Daja dusni-un, 'i be 'on nus 'utant'elh nuszun.

22 'Et hoonts'i tisdálh-un sba lhaóodonleh. Nohtenadudli gha la 'et ndó honeh. 'Ink'ez la nts'un sla nahudootnih.

Ye unzoo-i nyulh óot'e'

23 Epaphras, Sizi Gri gha sulh 'adin'ai-un, 'en cha hadih nyulhni.

24 Mark, Aristarchus, Demas, 'ink'ez Luke cha, sulh 'ut'enne, 'enne ts'iyawh hadih nyuhutni.

25 NeMoodihti Sizi Gri 'en ye unzoo-i nyughi bulh óot'e'. 'Et ndo honeh.